

# Ina clera finamira

## Partida liberaldemocratica dal Grischun

DA GION NUTEGN STGIER / ANR

■ **Esser suenter las elecziuns naziunales da quest onn represchentada cun duas persunas en il parlament federal. Quai è la clera finamira da la pld chantunala. Cussegliaer dals chantuns Martin Schmid duai vegnir confermà e da nov duai la pld er esser da la partida en il cussegl naziunal.** L'interess per la saira da nominaziun da la pld grischuna a Laax è stà fitg grond. Er sch'ils candidats e las candidatas per il cussegl naziunal eran gia dapi intgins mais enconuschents, nominads uffizialmain n'eran els anc betg. *Bruno Claus*, il president da la pld grischuna, ha ditg en ses pled d'introducciun che la partida haja be ina finamira per las elecziuns naziunales. Suentter quellas e suenter il 2010 duai la pld chantunala esser puspè preschenta en il cussegl naziunal. La reelecziun da cusseglier dals chantuns *Martin Schmid* saja per sazez, ha punctuà Claus.

### Cunter ina politica da scumonds

La pld grischuna stemia las valurs svizras, saja per ina solidaritad vitala, ella lessia simplifitgar las cundiziuns da basa e na impedir quellas e la pld saja per dismetter la politica da scumonds, ha ditg Claus. Ultra da quai veglia la pld er dapli persistenza, furmar la libertad e viver quella. Da cuminanza saja er pussaivel d'avair success tar las elecziuns naziunales, però saja la sfida gronda per turnar suenter il 2010 puspè en il cussegl naziunal cun in candidat ubain ina candidata. Quai che pertutga ina colliaziun da gli-

stas na saja anc decidì nagut, ha menziunà il president da la pld grischuna.

### Sa preschentar sco team

Ils trais candidats e las duas candidatas che vulan ir a Berna en il cussegl naziunal per la pld grischuna han lura già a Laax la chaschun da sa preschentar als numerus delegads ed als bliers simpatisants da la pld. Fatg han els ed ellas quai cun in film e suenter en in discurs personal cun deputà *Urs Marti*. Tar ils candidats e tar las candidatas da la pld per la chombra pitschna èn il turissem, l'economia, l'agricultura, il clima, il traffic, dapliras dunnas en il parlament, la scolaziun e furmaziun, las regiuns periferas e muntagnardas temas impurtants. Els ed ellas

vulan sa preschentar durant il cumbat electoral sco team e perquai è er la successiun dals nums sin la glista vegnida decidida tranter ils tschintg candidats e candidatas. Qua la successiun dals nums sin la glista principala da la pld: *Michael Pfäffli, Vera Stiffler, Andreas Züllig, Anna Giacometti e Martin Bundi*.

### Ina glista dals giuvens ed anc duas ulteriuras

En moda simpatica e liberala èn lura er sa preschentads als delegads e preschents ils quatter candidats e la candidata dals liberaldemocrats giuvens. In da quels è er *Gian Donatsch*, dapi trais dis il nov president da la pld giuvna grischuna. Cun el candideschan anc per il cussegl naziunal *Flavia Ae-*

*bli, Yannick Gartmann, Nico Züllig e Nino Fontana*. Il matg tar la radunanza generala da la pld grischuna vegnan anc preschentads diesch ulteriurs candidats e candidatas per duas ulteriurar glistas da la pld da noss chantun. Quels derivan da tut las regiuns dal Grischun e duajan simplamain far vuschs supplementaras per garantir a la pld in sez en il cussegl naziunal suenter che *Tarzius Caviezel* era na pli vegni elegi il 2010.

### GEA a refurma da taglia e finanziaziun AVS

A la radunanza da delegads a Laax ha la pld era decidì la parola per la votaziun dals 19 da matg 2019: In cler GEA a la lescha federala sur da la refurma da taglia e la finanziaziun da la AVS.



Per ils giuvens liberals van en il cumbat electoral Yannick Gartmann, Flavia Aebli, Gian Donatsch, Nino Fontana e Nico Züllig (da san.).

FOTO G. N. STGIER